



PREGUNTA I KONTESTA POSTULASHON DI KANDIDATO KOLEGIO ELEKTORAL

Bo vishon ta importante. Bo tambe por postulá bo mes!

Eerste Kamer general

Kiko ta Eerste Kamer?

Na Hulanda Eerste Kamer huntu ku Tweede Kamer ta forma Staten-Generaal (Parlamento) di Hulanda. Eerste Kamer ta deliberá i vota riba proyekto di lei ku Tweede Kamer ya a aprobá.

Ken ta eligí Eerste Kamer?

Eerste Kamer tin 75 asiento, i e miembronan di partido polítiko ta asumí e posishonnan aki. Otro ku ta e kaso serka Tweede Kamer, e pueblo hulandes no ta eligí e miembronan di Eerste Kamer direktamente. Kada kuater aña e miembronan di Parlamento Provinsial (Provinciale Staten) i, for di 2019, miembronan di e kolegianan elektoral pa Eerste Kamer na Hulanda Karibense (Saba, Sint Eustatius i Boneiru), ta eligí e miembronan di Eerste Kamer.

Kon largu e periodo ta ku miembronan di Eerste Kamer ta sinta?

Ta eligí e miembronan pa un periodo di kuater aña.

Kon Eerste Kamer ta, kompará ku Tweede Kamer?

Hulanda ta un demokrasia parlamentario. Esaki ta nifiká ku parlamento, na nòmber di pueblo, ta kontrolá gobièrnu i huntu ku gobièrnu ta traha lei. Tweede Kamer por entregá proyekto di lei, hasi kambio di lei i aprobá lei. Tratamentu di un teksto di lei den parlamento por ta un proseso ku ta dura largu. Ta deseabel pa na final di e proseso, revisá e proposishon di lei un biaha mas na un manera crítico. Eerste Kamer ta kumpli ku e tarea aki. E sistema di dos Kamer ta pone ku no ta tur poder ta konsentrá den un solo Kamer, ku ta posibel pa evaluá un proposishon i ku e siudadanonan tin tempu pa yama atenshon pa nan posibel opheshon.

Dikon ta di importansia pa e 3 entidatnan públiko tin influensia riba konstelashon di Eerste Kamer?

Den Tweede i Eerste Kamer ta tuma desishon tokante di e tres entidatnan públiko. Ora ku influensia e konstelashon di Eerste Kamer, den forma indirekto ta influensia tambe e desishonnan ku ta tuma ei den.

Kolegio elektoral general

Kiko kolegianan elektoral ta?

E kolegio elektoral pa Eerste Kamer na Hulanda Karibense ta órganonan di representante di pueblo ku a eligí, i ku, huntu ku e miembronan di Parlamento Provinsial, ta permití pa vota pa miembronan di Eerste Kamer. E kolegianan elektoral di ningun manera no ta enbolbí den ehekushon di tareanan gubernamental di e entidat públiko. Nan tin e tarea eksklusivo di eligí miembro di Eerste Kamer. Diferente for di loke ta e kaso serka konseho insular of Parlamento Provinsial, un kolegio elektoral no ta un órgano di representashon general.

Dikon Boneiru, Sint Eustatius i Saba kada unu tin un kolegio elektoral apart?

Lei ta basá riba un kolegio elektoral pa kada entidat públiko Karibense. Esaki tin e siguiente benefisionan kompará ku un kolegio elektoral konhunto:

- Votamentu pa kada entidat públiko separá ta tereno konosí pa e pueblo, konsiderando ku e ta similar na e manera riba kua e elekshonnan di konseho insular ta organisá;
- Representashon for di Saba i Sint Eustatius den un kolegio elektoral ta garantisá;
- Ta evitá ku gruponan polítiko na Hulanda Karibense mester traha huntu pa por tin un oportunitat di keda eligí komo miembro di un konseho elektoral;
- Un kolegio elektoral mester reuní físikamente pa por vota pa miembronan di Eerste Kamer. Un kolegio elektoral pa kada isla ta evitá e nesidat di biaha.

Kuantu hende lo haña asiento den e kolegianan elektoral?

E kantidat di miembro den e kolegio elektoral ta igual na e kantidat di miembro di konseho insular. Esaki ta nifiká ku e kolegio elektoral di Sint Eustatius i Saba ta konsistí di 5 miembro i e kolegio elektoral di Bonaire di 9 miembro.

Kon largu e periodo ta ku miembronan di kolegio elektoral ta sinta?

E periodo pa un kolegio elektoral sinta ta mes largu ku e periodo ku Eerste Kamer ta sinta, pues kuater aña.

Ta posibel pa disolvé kolegio elektoral promé ku e periodo kaba?

No ta posibel pa disolvé kolegio elektoral promé ku e periodo kaba.

Ken ta presidente di e kolegio elektoral?

Na Boneiru i Saba Gezaghèber di e entidat públiko konsernì ta presidente di kolegio elektoral. Na Sint Eustatius esaki ta e Komisario di Gobièrnu Sentral. Nan nó ta miembro di kolegio elektoral ni nan no ta vota pa atmití miembro nobo pa forma parti di kolegio elektoral. Tampoko e gezaghèbernan ni e Komisario di Gobièrnu Sentral tin derecho di voto pa elekshon di miembronan di Eerste Kamer. Banda di nan ròl komo presidente di kolegio elektoral, nan ta presidente tambe di e urna elektoral sentral pa elekshon di kolegio elektoral pa miembronan di Eerste Kamer.

Kuantu influensia e kolegianan elektoral tin riba Eerste Kamer?

Miembronan di parlamento provinsial i e kolegianan elektoral di Boneiru, Sint Eustatius i Saba ta eligí miembronan di Eerste Kamer. Mas tantu habitante un miembro di parlamento provinsial ta representá, mas tantu su voto ta pisa. E balor di voto di e miembronan di e kolegio elektoral ta keda determiná pa e kantidat di habitante di e entidat públiko, dividí den un kantidat ku ta shen biaha e kantidat di miembro.

Esaki ta nifiká ku e balor di voto, i konsekuentemente e influensia, na Boneiru ta un poko mas grandi ku esun na Sint Eustatius i Saba. Respektivamente 0,09 asiento, 0,01 asiento i 0,01 asiento. E influensia di Hulanda Karibense den su totalidat riba konstelashon di Eerste Kamer ta resultá den 0,11 asiento di Eerste Kamer.

Vota

Ken ta permití pa vota pa kolegio elektoral?

Residentenan hulandes di e entidat públiko konserní ku a yega e edat di diesocho aña i ku no ta ekskluí di derecho di voto.

Pa ki dia e elekshon ta planeá?

E elekshon di e 3 kolegionan elektoral ta tuma lugá riba djárason 20 di mart 2019 for di 07.30 or di mainta te ku 9 or di anochi. Esaki ta tuma lugá riba e mésun dia ku elekshon di konseho insular di Boneiru i Saba.

Dikon ta organisá elekshon di kolegio elektoral riba e mésun dia ku elekshon di konseho insular?

Elekshon di konseho insular ta tuma lugá pareu ku elekshon di Parlamento Provinsial. E hecho ku e elekshon di kolegio elektoral ta pareu ku esun di Parlamento Provinsial, ta evitá e posibilidat ku e resultado di esun elekshon ta influensia e resultado di e otro. Ademas votadónan ta bai urna un bes so urna un bes so, na lugá di dos bes, loke por tin un efekto positivo riba e asistencia. Finalmente tin benefisionan organisatorio i finansiero, ya ku ta hasi uso di e mésun lokalidatnan di vota i miembronan di urna.

Personanan ku derecho di voto ta risibí dos karchi pa vota na kas i nan mester vota dos bes riba e dia di elekshon?

Si, un persona ku derecho di voto ku ta permití di vota pa tur dos elekshon, ta risibí dos karchi pa vota na nan kas. Na e urna e ta risibí na mes momento e papel di vota pa kada elekshon. E ta yena e papel di vota den e hòki di vota i ta deponé esaki despues den e buzón destiná pa esaki. E buzónnan di e elekshon di kolegio elektoral i di konseho insular kada unu ta haña un diferente koló, ku ta kuadra ku e koló di e papel di vota.

Poné bo eligibel

Kua ta e eksigensianan ku mi mester kumpli kuné pa por pone mi mes eligibel?

Pa miembresia di un kolegio elektoral siudanía hulandes ta nesesario. E persona mester ta residente di e entidat públiko, mester a yega edat di 18 aña i no mester ta ekskluí di e derecho di voto. Ta ekskluí un persona di su derecho di voto den e siguiente kaso. Pa motibu di a kometé un delitu indiká den lei, a kondená e persona pa un kastigu di prizòn di por lo ménos un aña i komo kastigu adishonal a ekskluí e persona di su derecho di voto.

Pa evitá konflikto di interes, algun funshon ta inkompatibel ku miembresia di kolegio elektoral. Nivel di e entidat públiko ta trata di e funshonnan di: gezaghèber, miembro di kontrolaria konhunto i defensor di pueblo konhunto, òf miembro di komishon di defensor di pueblo konhunto. E funshonnan di empleado públiko, diputado insular i miembro di konseho insular no ta ekskluí, pues ta permití pa kombiná nan ku miembresia di kolegio elektoral.

Te ki dia mi por pone mi mes eligibel?

Mester entregá lista di kandidato na sentro elektoral pa elekshon di miembronan di kolegio elektoral riba 4 di febrüari 2019 entre 09:00 or i 17:00 or. Gruponan polítiko ku ke partisipá na e elekshon, por registrá te ku 24 di desèmber 2018. Den kaso ku e denominashon di un grupo polítiko ya ta registrá pa elekshon di konseho insular, registrashon di denominashon pa elekshon di kolegio elektoral no ta nesesario.

Un individuo tambe por pone su mes eligibel? Òf e mester ta mará na un grupo polítiko?

Un kandidato individual tambe por partisipá na elekshon di kolegio elektoral. Postulashon komo kandidato ta tuma lugá pa medio di un lista di kandidato. Riba e lista di kandidato por tin un "denominashon" (nòmber di un partido polítiko) poné (basta e denominashon ei ta registrá), pero esaki no tin mester. Esun ku partisipá sin un denominashon, ta partisipá ku un lista blanku, esta un lista bashí. Den e kaso ei riba e papel di voto tin pará solamente un number na e parti ariba di e lista, i no un denominashon /nòmber.

Miembro di kolegio elektoral ta risibí kompensashon?

Mirando e tarea limitá di kolegio elektoral i e sirkunstansia ku ta solamente algun bes den kuater aña kolegio ta reuní, lei no ta duna un base pa otorgá miembro di kolegio elektoral un kompensashon fiho. Nan ta haña sí sèn di presensia i, si ta aplikabel, kompensashon pa gastu di biahe. Mester determiná e kompensashon pa medio di un dekreto insular.

Miembro di kolegio elektoral mester publiká nan funshonnan sekundario?

Pa promové integridat personal di e miembronan di kolegio elektoral, nan ta obligá na publiká nan funshon(nan) sekundario. E publikamentu ta tuma lugá direktamente despues di nombrentu komo miembro di kolegio elektoral òf despues di aseptashon di e funshon sekundario.

Miembro di un kolegio elektoral mester huramentá òf hasi un promesa?

Si, miembronan di un kolegio elektoral ta huramentá òf ta hasi un deklarashon i promesa.

Dikon ta residente di entidatnan públiko ku pasaporte hulandes so por bai den e kolegio elektoral?

Esaki ta derivá for di e punto di salida ku ta solamente residente hulandes di e entidat públiko konserní por influensia (indirektamente) e konstelashon di Eerste Kamer.

Ta stipulá pa kada kolegio elektoral un kódigo di kondukta pa e miembro?

Si, kolegio elektoral mes ta stipulá un kódigo di kondukta. E kolegio elektoral mes ta determiná kua tópiko ta inkluí den e kódigo di kondukta i e mes ta responsabel pa kumplimentu ku e kódigo di kondukta. E kolegio elektoral mes ta responsabel pa kumplimentu ku e kódigo di kondukta. Si miembronan individual falta ku kumplimentu, esaki no tin konsekuensia direkto pa e miembresia, pero posiblemente por tin konsekuensia polítiko si.

Ken ta kontrolá e listanan di kandidato ku a entregá i e dokumentonan korespondiente pa e elekshon di Eerste Kamer?

A base di Lei Elektoral, e funshon aki ta pertenesé na e urna elektoral sentral. E proposishon di lei aki no ta kambia esaki. Pa elekshon di miembro di Eerste Kamer, Konseho Elektoral ta fungi komo urna elektoral sentral. Ta referí na e artíkulo proponé Ya 30, insiso tres, lesá den relashon ku artíkulo S 1, insiso unu i dos di Lei Elektoral.

Esaki ta kontesta riba e preguntanan mas hasí. Pa mas informashon, bishitá

www.rijksdienstcn.com/kolegioelektoral2019